Литургия оглашенных

Иерей: Благословенно Царство Отца и Сына и Святаго Духа ныне и присно и во веки веков.

Мы: Аминь.

Мирная ектения

Иерей: Миром Господу помолимся.

Мы: Господи помилуй. (На каждое прошение.)

Иерей: О свышнем мире и спасении душ наших Господу помолимся.

- О мире всего мира, благостоянии Святых Божиих Церквей и соединении всех Господу помолимся.
- О святем храме сем и с верою, благоговением и страхом Божиим входящих вонь Господу помолимся.
- О Великом Господине и Отце нашем Святейшем Патриарсе Кирилле, честнем пресвитерстве, во Христе диаконстве, о всем причте и людех Господу помолимся.
- О Богохранимей стране нашей, властех и воинстве ея Господу помолимся.
- О граде сем, всяком граде, стране и верою живущих в них Господу помолимся.
- О благорастворении воздухов, о изобилии плодов земных и временех мирных Господу помолимся.

- О плавающих, путешествующих, недугующих, страждущих, плененных и о спасении их Господу помолимся.
- О избавитися нам от всякия скорби, гнева и нужды Господу помолимся.
- Заступи, спаси, помилуй и сохрани нас, Боже, Твоею благодатию.
- Пресвятую, Пречистую, Преблагословенную, Славную Владычицу нашу Богородицу и Приснодеву Марию, со всеми святыми помянувше, сами себе и друг друга, и весь живот наш Христу Богу предадим.

Мы: Тебе, Господи.

Иерей: Яко подобает Тебе всякая слава, честь и поклонение, Отцу и Сыну и Святому Духу, ныне и присно и во веки веков.

Мы: Аминь.

Первый антифон

- **Мы:** Благослови, душе моя, Господа. / Благословен еси, Господи.
- Благослови, душе моя, Господа, / и вся внутренняя моя Имя Святое Его.
- Благослови, душе моя, Господа,/ и не забывай всех воздаяний Его.

- Очищающаго вся беззакония твоя, / исцеляющаго вся недуги твоя.
- Избавляющаго от истления живот твой, / венчающаго тя милостию и щедротами.
- Исполняющего во благих желание твое,/ обновится, яко орля, юность твоя.
- Творяй милостыни Господь, / и судьбу всем обидимым.
- Щедр и милостив Господь, / долготерпелив и многомилостив.
- Благослови, душе моя, Господа,/ и вся внутреняя моя,/ Имя Святое Его.// Благословен еси, Господи.

Малая ектения

Иерей: Паки и паки миром Господу помолимся.

Мы: Господи помилуй. (На оба прошения.)

Иерей: Заступи, спаси, помилуй и сохрани нас, Боже, Твоею благодатию.

Пресвятую, Пречистую, Преблагословенную, Славную Владычицу нашу Богородицу и Присно-

деву Марию, со всеми святыми помянувше, сами себе и друг друга, и весь живот наш Христу Богу предадим.

Мы: Тебе, Господи.

Иерей: Яко Твоя держава, и Твое есть Царство, и сила, и слава, Отца и Сына и Святаго Духа, ныне и присно и во веки веков.

Мы: Аминь.

Второй антифон

Мы: Хвали, душе моя, Господа.

Восхвалю Господа в животе моем, / пою Богу моему, дондеже есмь,

- Не надейтеся на князи, на сыны человеческия, / в нихже несть спасения.
- Изыдет дух его, и возвратится в землю свою: / в той день погибнут вся помышления его.
- Блажен, емуже Бог Иаковль помощник его, / упование его на Господа Бога своего.
- Сотворшаго небо и землю, / море и вся, яже в них.

- Хранящаго истину в век,/ творящаго суд обидимым,/ дающаго пищу алчущим.
- Господь решит окованныя, / Господь умудряет слепцы.
- Господь возводит низверженныя, / Господь любит праведники.
- Господь хранит пришельцы, / сира и вдову приимет, / и путь грешных погубит.
- Воцарится Господь во век,// Бог твой, Сионе, в род и род.
- Слава Отцу и Сыну и Святому Духу и ныне и присно и во веки веков. Аминь.

Единородный Сыне

Мы: Единородный Сыне и Слове Божий, Безсмертен Сый,/ и изволивый спасения нашего ради/ воплотитися от Святыя Богородицы и Приснодевы Марии,/ непреложно вочеловечивыйся;/ распныйся же, Христе Боже, смертию смерть Поправый,/ един Сый Святыя Троицы,// спрославляемый Отцу и Святому Духу, спаси нас.

Малая ектения

Иерей: Паки и паки миром Господу помолимся.

Мы: Господи помилуй. (На оба прошения.)

Иерей: Заступи, спаси, помилуй и сохрани нас, Боже, Твоею благодатию.

Пресвятую, Пречистую, Преблагословенную, Славную Владычицу нашу Богородицу и Приснодеву Марию, со всеми святыми помянувше, сами себе и друг друга, и весь живот наш Христу Богу предадим.

Мы: Тебе, Господи.

Иерей: Яко Благ и Человеколюбец Бог еси, и Тебе славу возсылаем, Отцу и Сыну и Святому Духу, ныне и присно и во веки веков.

Мы: Аминь.

Третий антифон

- **Мы:** Во Царствии Твоем помяни нас, Господи, / егда приидеши во Царствии Твоем.
- Блажени нищии духом, / яко тех есть Царство Небесное.
- Блажени плачущии,/ яко тии утешатся.
- Блажени кротции, / яко тии наследят землю.
- Блажени алчущии и жаждущии правды, / яко тии насытятся.
- Блажени милостивии, / яко тии помиловани будут.
- Блажени чистии сердцем, / яко тии Бога узрят.
- Блажени миротворцы, / яко тии сынове Божии нарекутся.
- Блажени изгнани правды ради, / яко тех есть Царство Небесное.
- Блажени есте, егда поносят вам, / и изженут, и рекут всяк зол глагол на вы, лжуще Мене ради.

Радуйтеся и веселитеся, / яко мзда ваша многа на Небесех.

Иерей: Премудрость, прости.

Мы: Приидите, поклонимся и припадем ко Христу. Спаси ны, Сыне Божий, воскресый из мертвых, поющия Ти: аллилуиа.

Тропари и кондаки

В зависимости от дня поются тропари и кондаки.

Тропарь пророка Илии, глас 4:

Во плоти Ангел,/ пророков основание,/вторый Предтеча пришествия Христова, Илия славный,/ свыше пославый Елиссееви благодать/ недуги отгоняти/ и прокаженныя очищати,// темже и почитающим его точит исцеления.

Кондак пророка Илии, глас 2:

Пророче и провидче великих дел Бога нашего, / Илие великоимените, / вещанием твоим уставивый водоточныя облаки, // моли о нас Единаго Человеколюбца.

Иерей: Яко Свят еси, Боже наш, и Тебе славу возсылаем, Отцу и Сыну и Святому Духу, ныне и присно и во веки веков.

Мы: Аминь.

Иерей: Господи, спаси благочестивыя и услыши ны.

Мы: Господи, спаси благочестивыя и услыши ны.

Трисвятое

Мы: Святый Боже, Святый Крепкий, Святый Безсмертный, помилуй нас. (Трижды.)

Слава Отцу и Сыну и Святому Духу, и ныне и присно и во веки веков. Аминь.

Святый Безсмертный, помилуй нас.

Святый Боже, Святый Крепкий, Святый Безсмертный, помилуй нас.

Чтение Апостола и Евангелия

После прочтения Апостола чтец возглашает:

Чтец: Псалом Давидов. Аллилуия.

Мы: Аллилуиа, аллилуиа, аллилуиа.

Чтец: Произносит стих из псалма.

Мы: Аллилуиа, аллилуиа, аллилуиа.

Чтец: Произносит второй стих из псалма.

Мы: Аллилуиа, аллилуиа, аллилуиа.

Чтец: Произносит третий стих из псалма.

Мы: Аллилуиа, аллилуиа, аллилуиа.

Чтец: Аллилуиа.

Мы: Аллилуиа, аллилуиа, аллилуиа.

Иерей: Премудрость, прости, услышим Святаго Евангелия. Мир всем.

евангелия. Мир всем. --

Мы: И духови твоему.

Иерей: От ... Святаго Евангелия чтение.

Мы: Слава Тебе, Господи, слава

Тебе.

Иерей: Вонмем.

Чтение Евангелия. По окончании чтения:

Мы: Слава Тебе, Господи, слава

Тебе.

Сугубая ектения

Иерей: Рцем вси от всея души и от всего помышления нашего рцем.

Мы: Господи, помилуй.

Иерей: Господи Вседержителю, Боже отец наших, молим Ти ся, услыши и помилуй.

Мы: Господи, помилуй.

Иерей: Помилуй нас, Боже, по велицей милости Твоей, молим Ти ся, услыши и помилуй.

Мы: Господи, помилуй, Господи, помилуй, Господи, помилуй. (На каждое прошение.)

Иерей: Еще молимся о Великом Господине и Отце нашем Святейшем Патриарсе Кирилле, и всей во Христе братии нашей.

Еще молимся о Богохранимей стране нашей, властех и воинстве ея, да тихое и безмолвное житие поживем во всяком благочестии и чистоте.

Еще молимся о братиях наших, священницех, священномонасех и всем во Христе братстве нашем.

Еще молимся о блаженных и приснопамятных святейших патриарсех православных, и создателех святаго храма сего и о всех прежде почивших отцех и братиях, зде лежащих и повсюду, православных.

Еще молимся о милости, жизни, мире, здравии, спасении, посещении, прощении и оставлении грехов рабов Божиих, братии святаго храма сего.

Еще молимся о плодоносящих и добродеющих во святем и всечестнем храме сем, труждающихся, поющих и предстоящих людех, ожидающих от Тебе великия и богатыя милости.

Иерей: Яко милостив и Человеколюбец Бог еси, и Тебе славу возсылаем, Отцу и Сыну и Святому Духу, ныне и присно и во веки веков.

Мы: Аминь.

Ектения об оглашенных

Иерей: Помолитеся, оглашеннии, Господеви.

Мы: Господи, помилуй. (На каждое прошение.)

Иерей: Вернии, о оглашенных помолимся, да Господь помилует их.

Огласит их словом истины.

Открыет им Евангелие правды.

Соединит их Святей Своей, Соборней и Апостольстей Церкви.

Спаси, помилуй, заступи и сохрани их, Боже, Твоею благодатию.

Оглашеннии, главы ваша Господеви приклоните.

Мы: Тебе, Господи. (Протяжно.)

Иерей: Да и тии с нами славят пречестное и великолепое Имя Твое, Отца и Сына и Святаго Духа, ныне и присно и во веки веков.

Мы: Аминь.

Литургия верных

Иерей: Елицы оглашеннии, изыдите, оглашеннии, изыдите; елицы оглашеннии, изыдите. Да никто от оглашенных, елицы вернии, паки и паки миром Господу помолимся.

Мы: Господи, помилуй. (Протяжно.)

Иерей: Заступи, спаси, помилуй и сохрани нас, Боже, Твоею благодатию.

Мы: Господи, помилуй.

Иерей: Премудрость.

Иерей: Яко подобает Тебе всякая слава, честь и поклонение, Отцу и Сыну и Святому Духу, ныне и присно и во веки веков.

Мы: Аминь.

Иерей: Паки и паки миром Господу помолимся.

Мы: Господи, помилуй. (Протяжно.)

Премудрость.

Иерей: Яко да под державою Твоею всегда храними, Тебе славу возсылаем, Отцу и Сыну и Святому Духу, ныне и присно и во веки веков.

Мы: Аминь. (Протяжно.)

Херувимская песнь

Мы: Иже Херувимы тайно образующе и Животворящей Троице Трисвятую песнь припевающе, всякое ныне житейское отложим попечение.

Иерей и диакон исходят из алтаря северными вратами на солею.

Иерей: Великаго Господина и Отца нашего Кирилла, Святейшего Патриарха Московского и всея Руси да помянет Господь Бог во Царствии Своем всегда, ныне и присно и во веки веков.

Вас и всех православных христиан да помянет Господь Бог во Царствии Своем всегда, ныне и присно и во веки веков.

Мы: Аминь. Яко да Царя всех подымем, ангельскими невидимо дориносима чинми. Аллилуиа, аллилуиа, аллилуиа, аллилуиа.

Просительная ектения

Иерей: Исполним молитву нашу Господеви.

Мы: Господи, помилуй. (На каждое прошение.)

- **Иерей:** О предложенных честных Дарех Господу помолимся.
- О святем храме сем и с верою, благоговением и страхом Божиим входящих в онь Господу помолимся.
- О избавитися нам от всякия скорби, гнева и нужды Господу помолимся.
- Заступи, спаси, помилуй и сохрани нас, Боже, Твоею благодатию.
- Дне всего совершенна, свята, мирна и безгрешна у Господа просим.

Мы: Подай, Господи. (На каждое прошение.)

- **Иерей:** Ангела мирна, верна наставника, хранителя душ и телес наших у Господа просим.
- Прощения и оставления грехов и прегрешений наших у Господа просим.
- Добрых и полезных душам нашим и мира мирови у Господа просим.
- Прочее время живота нашего в мире и покаянии скончати у Господа просим.
- Христианския кончины живота нашего, безболезнены, непостыдны, мирны, и добраго ответа на Страшнем Судищи Христове просим.

Пресвятую, Пречистую, Преблагословенную, Славную Владычицу нашу Богородицу и Приснодеву Марию, со всеми святыми помянувше, сами себе, и друг друга, и весь живот наш Христу Богу предадим.

Мы: Тебе, Господи.

Иерей: Щедротами Единороднаго Сына Твоего, с Нимже благословен еси, со Пресвятым и Благим и Животворящим Твоим Духом, ныне и присно и во веки веков.

Мы: Аминь. **Иерей:** Мир всем.

Мы: И духови твоему.

Иерей: Возлюбим друг друга, да единомыслием исповемы.

Мы: Отца и Сына и Святаго Духа, Троицу Единосущную и Нераздельную.

Иерей: Двери, двери, премудростию вонмем.

Символ веры

Мы: Верую во Единаго Бога Отца Вседержителя, Творца небу и земли, видимым же всем и невидимым. И во Единаго Господа Иисуса Христа, Сына Божия, Единороднаго, Иже от Отца рожденнаго прежде всех век. Света от Света, Бога истинна от Бога истинна, рожденна, несотворенна, Единосущна Отцу, Имже вся быша. Нас ради человек и нашего ради спасения сшедшаго с Небес, и воплотившагося от Духа Свята и Марии Девы, и вочеловечшася. Распятаго же за ны при Понтийстем Пилате, и страдавша, и погребенна. И воскресшаго в третий день по Писанием. И восшедшаго Небеса, и седяща одесную Отца. И паки грядущаго со славою судити живым и мертвым, Егоже

Царствию не будет конца. И в Духа Святаго, Господа Животворящаго, Иже от Отца исходящаго, Иже со Отцем и Сыном спокланяема и сславима, глаголавшаго пророки. Во едину Святую Соборную и Апостольскую Церковь. Исповедую едино Крещение во оставление грехов. Чаю воскресения мертвых и жизни будущаго века. Аминь.

Иерей: Станем добре, станем со страхом, вонмем, Святое Возношение в мире приносити.

Мы: Милость мира, жертву хваления.

Иерей: Благодать Господа нашего Иисуса Христа, и любы Бога и Отца, и причастие Святаго Духа буди со всеми вами.

Мы: И со духом твоим.

Иерей: Горе имеим сердца.

Мы: Имамы ко Господу.

Иерей: Благодарим Господа.

Мы: Достойно и праведно есть покланятися Отцу и Сыну и Святому Духу, Троице Единосущней и Нераздельней.

Иерей молится: Достойно и праведно Тя пети, Тя благословити, Тя хвалити, Тя благодарити, Тебе покланятися на всяком месте владычествия Твоего. Ты бо еси Бог неизреченен, недоведомь, невидим, непостижим, присно сый, такожде сый, Ты, и Единородный Твой Сын, и Дух Твой Святый. Ты от небытия в бытие нас привел еси, и отпадшия возставил еси паки, и не отступил еси, вся творя, дондеже нас на Небо возвел еси и Царство Твое даровал еси будущее. О сих всех благодарим Тя, и Единороднаго Твоего Сына, и Духа Твоего Святаго, о всех, ихже вемы и ихже не вемы, явленных и неявленных благодеяниих, бывших на нас. Благодарим Тя и о службе сей, юже от рук наших прияти изволил еси, аще и предстоят Тебе тысящи Архангелов и тьмы Ангелов, Херувими и Серафими, шестокрилатии, многоочитии, возвышающиеся, пернатии.

Иерей возглашает: Победную песнь поюще, вопиюще, взывающе и глаголюще.

Мы: Свят, Свят, Свят Господь Саваоф, исполнь Небо и земля славы Твоея; осанна в вышних,

благословен Грядый во Имя Господне, осанна в вышних.

Иерей молится: С сими и мы блаженными Силами, Владыко Человеколюбче, вопием и глаголем: Свят еси и Пресвят, Ты, и Единородный Твой Сын, и Дух Твой Святый, Свят еси и Пресвят, и великолепна слава Твоя, Иже мир Твой тако возлюбил еси, якоже Сына Своего Единороднаго дати, да всяк веруяй в Него не погибнет, но имать живот вечный. Иже пришед и все еже о нас смотрение исполнив, в нощь, в нюже предаяшеся, паче же Сам Себе предаяше за мирский живот, прием хлеб во Святыя Своя и Пречистыя и непорочныя руки, благодарив и благословив, освятив, преломив, даде святым Своим учеником и апостолом, рек:

Иерей возглашает: Приимите, ядите, Сие есть Тело Мое, еже за вы ломимое во оставление грехов.

Мы: Аминь.

Иерей молится: Подобие и Чашу по вечери, глаголя: **Иерей возглашает:** Пийте от нея вси, Сия есть Кровь Моя Новаго Завета, яже за вы и за многи изли-

ваемая во оставление грехов.

Мы: Аминь.

Иерей молится: Поминающе убо спасительную сию заповедь и вся, яже о нас бышая: Крест, Гроб, тридневное Воскресение, на Небеса восхождение, одесную седение, второе и славное паки пришествие.

Иерей возглашает: Твоя от Твоих Тебе приносяще о всех и за вся.

Мы: Тебе поем, Тебе благословим, Тебе благодарим, Господи, и молим Ти ся, Боже Наш.

Иерей молится: Еще приносим Ти словесную сию и безкровную службу, и просим, и молим, и мили ся деем, низпосли Духа Твоего Святаго на ны и на предлежащия Дары сия, и сотвори убо Хлеб Сей Честное Тело Христа Твоего, а еже в Чаши сей — Честную Кровь Христа Твоего. преложив Духом Твоим Святым. Якоже быти причащающимся во трезвение души, во оставление грехов, в приобщение Святаго Твоего Духа, во исполнение Царствия Небеснаго, в дерзновение еже к Тебе, не в суд или во осуждение. Еще приносим Ти словесную сию службу о иже в вере почивших праотцех, отцех, патриарсех, пророцех, апостолех, проповедницех, евангелистех, мученицех, исповедницех, воздержницех и о всяком дусе праведней, в вере скончавшемся.

Иерей возглашает: Изрядно о Пресвятей, Пречистей, Преблагословенней, Славней Владычице нашей Богородице и Приснодеве Марии.

Мы: Достойно есть, яко воистину блажити Тя, Богородицу, Присноблаженную и Пренепорочную и Матерь Бога нашего. Честней-

шую Херувим и Славнейшую без сравнения Серафим, без изстления Бога Слова рождшую, сущую Богородицу Тя величаем.

На Литургии свт. Василия Великого вместо «Достойно есть...» мы: О Тебе радуется, Благодатная, всякая тварь, ангельский собор и человеческий род, освященный Храме и Раю словесный, девственная похвало, из Неяже Бог воплотися и младенец бысть, прежде век сый Бог наш; ложесна бо Твоя престол сотвори и чрево Твое пространнее небес содела. О Тебе радуется, Благодатная, всякая тварь, слава Тебе.

Иерей молится: О святем Иоанне Пророце, Предтечи и Крестители, о святых славных и всехвальных Апостолех, о святем *чимя*, егоже и память совершаем, и о всех святых Твоих, ихже молитвами посети нас, Боже. И помяни всех усопших о надежди воскресения жизни веч-

ныя *чимена* и упокой их, идеже присещает свет лица Твоего. Еще молим Тя, помяни, Господи, всякое епископство православных, право правящих слово Твоея истины, всякое пресвитерство, во Христе диаконство и всякий священнический чин. Еще приносим Ти словесную сию службу о вселенней, о Святей, Соборней и Апостольстей Церкви, о иже в чистоте и честнем жительстве пребывающих; о богохранимей стране нашей, властех и воинстве ея. Даждь им, Господи, мирное правление, да и мы в тишине их тихое и безмолвное житие поживем, во всяком благочестии и чистоте.

Иерей возглашает: В первых помяни, Господи, Великаго Господина и Отца нашего Кирилла, Святейшаго Патриарха Московскаго и всея Руси, егоже даруй святым Твоим Церквам в мире, цела, честна, здрава, долгоденствующа, право правяща слово Твоея истины.

Мы: И всех и вся.

Иерей молится: Помяни, Господи, град сей, в немже живем, и всякий град и страну и верою живущих в них. Помяни, Господи, плавающих, путешествующих, недугующих, страждущих, плененных, и спасение их. Помяни, Господи, плодоносящих и добротворящих во святых Твоих церквах, и поминающих убогия, и на вся ны милости Твоя низпосли.

Иерей возглашает: И даждь нам едиными усты и единым сердцем славити и воспевати Пречест-

ное и Великолепое Имя Твое, Отца и Сына и Святаго Духа, ныне и присно и во веки веков.

Мы: Аминь.

Иерей: И да будут милости Великаго Бога и Спаса нашего Иисуса Христа со всеми вами.

Мы: И со духом твоим.

Просительная ектения

Иерей: Вся святыя помянувше, паки и паки миром Господу помолимся.

Мы: Господи, помилуй. (На каждое прошение.)

Иерей: О принесенных и освященных Честных Дарех Господу помолимся.

Яко да Человеколюбец Бог наш, приемь я во святый, и пренебесный, и мысленный Свой Жертвенник, в воню благоухания духовнаго, возниспослет нам Божественную благодать и дар Святаго Духа, помолимся.

[О избавитися нам от всякия скорби, гнева и нужды Господу помолимся.

Заступи, спаси, помилуй и сохрани нас, Боже, Твоею благодатию.

Дне всего совершенна, свята, мирна и безгрешна у Господа просим.

Мы: Подай, Господи. (На каждое прошение.)

Иерей: Ангела мирна, верна наставника, хранителя душ и телес наших у Господа просим.

- Прощения и оставления грехов и прегрешений наших у Господа просим.
- Добрых и полезных душам нашим и мира мирови у Господа просим.
- Прочее время живота нашего в мире и покаянии скончати у Господа просим.
- Христианския кончины живота нашего, безболезнены, непостыдны, мирны, и добраго ответа на Страшнем Судищи Христове просим.]
- Соединение веры и причастие Святаго Духа испросивше, сами себе, и друг друга, и весь живот наш Христу Богу предадим.

Мы: Тебе, Господи.

Иерей: И сподоби нас, Владыко, со дерзновением, неосужденно смети призывати Тебе, Небеснаго Бога Отца, и глаголати:

Мы: Отче наш, Иже еси на Небесех! Да святится Имя Твое, да приидет Царствие Твое, да будет воля Твоя, яко на Небеси и на земли. Хлеб наш насущный даждь нам днесь, и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Иерей: Яко Твое есть Царство, и сила, и слава, Отца и Сына и Святаго Духа, ныне и присно и во веки веков.

Мы: Аминь. **Иерей:** Мир всем.

Мы: И духови твоему.

Иерей: Главы ваша Господеви приклоните.

Мы: Тебе, Господи. (Протяжно.)

Иерей: Благодатию, и щедротами, и человеколюбием Единороднаго Сына Твоего, с Нимже благословен еси, со Пресвятым и Благим и Животворящим Твоим Духом, ныне и присно и во веки веков.

Мы: Аминь. (Протяжно.)

Иерей: Вонмем.

Иерей: Святая святым.

Мы: Един Свят, един Господь Иисус Христос, во славу Бога Отца. Аминь.

И поется причастный стих. В воскресеный день:

Мы: Хвалите Господа с небес, хвалите Его в вышних. Аллилуиа, аллилуиа, аллилуиа.

И псалом 33:

Мы: Благословлю Господа на всякое время, выну хвала Его во

устех моих. О Господе похвалится душа моя, да услышат кротции, и возвеселятся. Возвеличите Господа со мною, и вознесем Имя Его вкупе. Взысках Господа, и услыша мя, и от всех скорбей моих избави мя. Приступите к Нему и просветитеся, и лица ваша не постыдятся. Сей нищий воззва, и Господь услыша и, и от всех скорбей его спасе и. Ополчится ангел Господень окрест боящихся Его, и избавит их. Вкусите, и видите, яко благ Господь: блажен муж, иже уповает Нань. Бойтеся Господа вси святии Его, яко несть лишения боящимся Его. Богатии обнищаша и взалкаша: взыскающии же Господа не лишатся всякаго блага. Приидите, чада, послушайте мене, страху Господню научу вас. Кто есть человек хотяй живот, любяй дни видети благи? Удержи язык твой от зла, и устне твои, еже не глаголати льсти. Уклонися от зла и сотвори благо. Взыщи мира, и пожени и. Очи Господни на праведныя, и уши Его в молитву их. Лице же Господне на творящыя злая, еже потребити от земли память их. Воззваша праведнии, и Господь услыша их, и от всех скорбей их избави их. Близ Господь сокрушенных сердцем, и смиренныя духом спасет. Многи скорби праведным, и от всех их избавит я Господь. Хранит Господь вся кости их, ни едина от них сокрушится. Смерть грешников люта, и ненавидящии праведнаго прегрешат. Избавит Господь душы раб Своих, и не прегрешат вси уповающии на Него.

Отверзаются Царские врата.

Иерей: Со страхом Божиим и верою приступите.

Мы: Благословен Грядый во Имя Господне, Бог Господь и явися нам.

Иерей: Верую, Господи, и исповедую, яко Ты еси воистину Христос, Сын Бога Живаго, пришедый в мир грешныя спасти, от нихже первый есмь аз. Еще верую, яко Сие самое есть Пречистое Тело Твое, и Сия самая есть Честная Кровь Твоя. Молюся убо Тебе: помилуй мя, и прости ми прегрешения моя, вольная и невольная, яже словом, яже делом, яже ведением и неведением, и сподоби мя неосужденно причаститися Пречистых Твоих Таинств, во оставление грехов и в жизнь вечную. Аминь. Вечери Твоея Тайныя днесь, Сыне Божий, причастника мя приими; не бо врагом Твоим тайну повем, ни лобзания ти дам яко Иуда, но яко разбойник исповедаю Тя: помяни мя, Господи, во Царствии Твоем. Да не в суд или во осуждение будет мне причащение Святых Твоих Тайн, Господи, но во исцеление души и тела.

Во время причащения:

Мы: Тело Христово приимите, Источника безсмертнаго вкусите.

По окончании причащения:

Мы: Аллилуиа, аллилуиа, аллилуиа.

Иерей: Спаси, Боже, люди Твоя и благослови достояние Твое.

Мы: Видехом Свет Истинный, прияхом Духа Небеснаго, обретохом веру истинную, Нераздельней Троице покланяемся, Та бо нас спасла есть.

Иерей: Всегда, ныне и присно и во веки веков.

Мы: Аминь. Да исполнятся уста наша хваления Твоего, Господи, яко да поем славу Твою, яко сподобил еси нас причаститися Святым Твоим, Божественным, Безсмертным и Животоворящим Тайнам; соблюди нас во Твоей святыни, весь день поучатися правде Твоей. Аллилуиа, аллилуиа, аллилуиа.

Иерей: Прости приимше Божественных, Святых, Пречистых, Безсмертных, Небесных и Животворящих, Страшных Христовых Тайн, достойно благодарим Господа.

Мы: Господи, помилуй. (На каждое прошение.)

Иерей: Заступи, спаси, помилуй и сохрани нас, Боже, Твоею благодатию.

День весь совершен, свят, мирен и безгрешен испросивше, сами себе, и друг друга, и весь живот наш Христу Богу предадим.

Мы: Тебе, Господи.

Иерей: Яко Ты еси Освящение наше, и Тебе славу возсылаем, Отцу и Сыну и Святому Духу, ныне и присно и во веки веков.

Мы: Аминь.

Иерей: С миром изыдем.

Мы: О имени Господни.

Иерей: Господу помолимся.

Мы: Господи, помилуй.

Иерей: Благословляяй благословящия Тя, Господи, и освящаяй на Тя уповающия, спаси люди Твоя и благослови достояние Твое, исполнение Церкве Твоея сохрани, освяти любящия благолепие дому Твоего; Ты тех возпрослави Божественною Твоею силою, и не остави нас, уповающих на Тя. Мир мирови Твоему даруй, Церквам Твоим, священником, воинству и всем людем Твоим. Яко всякое даяние благо, и всяк дар совершен свыше есть, сходяй от Тебе, Отца Светов; и Тебе славу, и благодарение, и поклонение возсылаем, Отцу и Сыну и Святому Духу, ныне и присно и во веки веков.

Мы: Аминь.

Мы: Буди Имя Господне благословенно отныне и до века. (*Трижды.*)

Иерей: Благословение Господне на вас, Того благодатию и человеколюбием, всегда, ныне и присно и во веки веков.

Мы: Аминь.

Иерей: Слава Тебе, Христе Боже, Упование наше, слава Тебе.

Мы: Слава Отцу и Сыну и Святому Духу, и ныне и присно и во веки веков, аминь.

Господи, помилуй, Господи, помилуй, Господи, помилуй.

Благослови.

Иерей: Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных Апостол, <святого, которого память в этот день>, иже во святых отца нашего Иоанна, архиепископа Константина града, Златоустаго, и всех святых, помилует и спасет нас, яко Благ и Человеколюбец.

Мы: Аминь.

Во время целования креста поем стихиру: Иже Крестом ограждаеми, врагу противляемся, не боящеся того коварствия, ни лаяния, яко бо гордый упразднися и попран бысть на Древе силою Распятаго Христа.

Также многолетие: Великаго Господина и Отца нашего Кирилла, Святейшаго Патриарха Московскаго и всея Руси, настоятеля, братию и прихожан святаго храма сего и вся православныя христианы, Господи, сохрани их на многая лета.

КОНЕЦ И БОГУ НАШЕМУ СЛАВА

Свёрстано для пения на Божественной Литургии в воскресный день при служении иерея без диакона в Ильинском приделе храма Рождества Христова в Митино

Подготовлено и отпечатано в издательстве «Орфограф» www.orfograf.com info@orfograf.com +7 (926) 449·61·99

Тираж 200 экз

Москва, 2018 год